

# 幼学琼林

作者：（明）程登吉

## 【天文】

混沌初開，乾坤始奠；

氣之輕清上浮者為天，氣之重濁下凝者為地。

日月五星，謂之七政；天地與人，謂之三才。

日為衆陽之宗，月乃太陰之象。

虹名蜺蜺，乃天地之淫氣；月裏蟾蜍，是月魄之精光。

風欲起而石燕飛，天將雨而商羊舞。

旋風名為羊角，閃電號曰雷鞭；

青女是霜之神，素娥即月之號。

雷部至捷之鬼曰律令，雷部推車之女曰阿香。

云師係是丰隆，雪神乃是滕六。

欵火謝仙，俱掌雷火；飛廉箕伯，悉是風神。

列缺乃電之神，望舒是月之御。

甘霖豐澤，俱指時雨；玄穹彼蒼，悉稱上天。

雪花飛六出，先兆年豐；日上已三竿，乃云時晏。

蜀犬吠日，比人所見甚稀；吳牛喘月，笑人畏怯過甚。

望切者若雲霓之望，恩深者如雨露之恩；

參商二星，其出沒不相見；牛女兩宿，惟七夕一相逢。

后羿妻，奔月宮而為嫦娥；傅說死，其精神托於箕尾。

披星戴月，謂早夜之奔馳；沐雨櫛風，謂風塵之勞苦。

事非有意，譬如雲出無心；恩可遍施，乃謂陽春有腳。

饋物致敬，曰敢效獻曝之忱；托人轉移，曰全賴回天之力。  
感救死之恩曰再造，誦再生之德曰二天；  
勢易盡者若冰山，事相懸者如天壤。  
晨星謂賢人寥落，雷同謂言語相符。  
心多過慮，何異杞人憂天；事不量力，不殊夸父追日。  
如夏日之可畏，是謂趙盾；冬日之可愛，是謂趙衰。  
齊婦含冤，三年不雨；鄒衍下獄，六月飛霜。  
父仇不共戴天，子道須當愛日。  
盛世黎民，嬉遊於光天化日之下；  
太平天子，上召夫景星慶雲之祥。  
夏時大禹在位，上天雨金；春秋孝經既成，赤虹化玉。  
箕好風，畢好雨，比庶民願欲不同；  
風從虎，雲從龍，比君臣會合不偶。  
雨暘時若，係是休徵；天地交泰，斯稱盛世。

# 幼学琼林

作者：（明）程登

## 〔地輿〕

黃帝畫野，始分都邑；夏禹治水，初奠山川。宇宙之江山不改，古今之稱謂各殊。

北京原屬幽燕，金臺乃其異號；南都本為建業，金陵又是別名。

浙江係武林之區，原為越國；江西是豫章之地，又號吳皋。

福建省隸七閩，湖廣地名三楚。東魯西魯，即山東山西之分；東粵西粵，為廣東廣西之域。

河南在華夏之中，故曰中州；陝西即長安之地，原為秦境。四川古稱蜀國，雲南漢置滇池；貴州僻處蠻方，荒服舊為黔地。

東嶽泰山，西嶽華山，南嶽衡山，北嶽恆山，中嶽嵩山，此之謂五嶽；饒之鄱陽，湘之青草，巴之洞庭，潤之丹陽，蘇之太湖，此之謂五湖。

金城湯池，謂疆圉之鞏固；河山帶礪，實封建之誓盟。帝都曰京師，故鄉曰梓里。

蓬萊弱水，非飛仙不可渡；十洲三島，惟真修乃可居。滄海桑田，慨世代之更變；河清海晏，兆寰宇之昇平。

水神曰馮夷，又曰陽侯；火神曰祝融，又曰回祿；海神曰海若，海眼曰尾閭。

望人包容曰海涵；謝人賙恤曰河潤。

無繫累者，江湖散人；負豪氣者，湖海之士。

問舍求田，原無大志；經天緯地，方是奇才。空中起釁，謂之平地風波；獨立不移，謂之中流砥柱。

黑子彈丸，渺小之邑；咽喉右臂，要害之區。

獨力難持，一木焉能支大廈；英雄自恃，丸泥可以封函關。

事先敗而後成，曰失之東隅，收之桑榆；事垂成而中止，曰爲山九仞，功虧一簣。

以蠡測海，喻人之見小；精衛銜石，比人之徒勞。跋涉謂行路艱難，康莊謂道途平坦。

瘠土曰不毛之地，沃壤曰膏腴之田。得物無用，如獲石田；爲學有成，已登道岸。

淄澠之滋味可辨，涇渭之清濁當分；泌水樂飢，隱居不仕；東山高臥，清節可風。

聖人出而黃河清，太守廉而越石見。

醇俗曰仁里，惡俗曰互鄉。里名勝母，曾子不入；邑號朝歌，墨子回車。

擊壤而嬉，上世之黎民自得；讓畔而耕，西周之百姓相推。長房有縮地之方，始皇有鞭石之法。

堯有九年之水患，湯有七年之旱災。

商君不仁而阡陌開，夏王無道而伊洛竭。路不拾遺，由在上之有善政；海不揚波，知中國之有聖人。